

四庫全書

史部

欽定四庫全書

畿輔通志卷十

宸章

聖祖仁皇帝

甲申春謁

陵回鑾路經盤山有僧智樸呈接駕詩即用原韻二首

廿載常輕步年華去莫從古松分遠近老衲自蒼容問
及當時景猶疑隔嶺重山高勞脚力來往徧雲峰

其二

鈴鐸鳴山下田疇雨露恩

是日微雨

經聲連靜舍法語閉柴

門隱跡安無意清思禮世尊春風來拂面依舊是乾坤

看運河建壩處

十月風霜幸潞河隔林疎葉盡寒柯岸邊土薄難容水
隄外沙沈易漲波春末淺夫忙用力秋深霖雨失時禾
往來踟躕臨淵歎何惜分流建壩多

大城文安等處堤修完舟中駐蹕王家口

積水頻縈慮長堤幸已成桑麻連井邑花柳近清明漸
愜勤民意還深問俗情蘭橈經過處布穀喚春耕

靜明園喜雨

西山初夏玉泉清暮雨隨風滿鳳城四野皆霑比屋慶
八荒盡望樂豐盈

密雲作

連年駐蹕此城隈雲谷無塵金碧堆斗室何妨宇宙志
晨昏常掖

輦輿同

將之山莊四首

畏暑心何勝
平明出玉墀
萬幾豈歇息
臨政有疇咨

其二

暖溜自平地
風光此日佳
暄波由近發
浩澤無津涯

其三

駐輦相風竿
臨書羨五傳
晴瀾分暑節
疏爽須葵扇

其四

霖雨消塵蹟輕霞照野荆詞臣每扈從上賞賦昆明

避暑駐蹕山莊六月間陰霖少晴自立秋日晴霽

喜懷

亢陽望十雨霪雨思晴天累日貫秋序終朝潦水綿身
雖無暑汗心實抱迤邐忽覩西風緊油雲逐嶺巔

山莊夜雨聽灤河溜聲

臨流震耳似驚潮滾滾泠泠眺綺寮夜色初分秋景霽
風聲已送積霖飄皆因百壑歸來遠非是孤川自去饒

可比長江無棄物小河水涸豈容橈

避暑山莊三十六咏

煙波致爽

并序

熱河地既高敞氣亦清朗無蒙霧霾氛柳宗元記所謂曠如也四圍秀嶺十里澄湖致有爽氣雲山勝地之南有屋七楹遂以煙波致爽顏其額焉

山莊頻避暑靜默少喧嘩北控遠煙息南臨近壑嘉春歸魚出浪秋斂雁橫沙觸目皆仙草迎牕遍藥花炎風

晝致爽綿雨夜方賒土厚登雙穀泉甘剖翠瓜古人戍
武備今卒斷鳴茄生理想農事聚民至萬家

芝逕雲隄

并序

夾水為隄逶迤曲折逕分三枝列大小洲三形若芝
英若雲朶復若如意有二橋通舟楫

萬幾少暇出丹闕樂水樂山好難歇避暑漠北土脈肥
訪問村老尋石碣衆云蒙古牧馬場並乏人家無枯骨
草木茂絕蚊蝎泉水佳人少疾因而乘騎閱河隈灣灣

曲曲滿林樾測量荒野閱水平莊田勿動樹勿發自然
天成地就勢不待人力假虛設君不見磬鍾峰獨峙山
麓立其東又不見萬壑松偃蓋重林造化同煦嫗光臨
承露照青蔥色轉頻歲豐遊豫常思傷民力又恐偏勞
土木工命匠先開芝逕隄隨山依水揉輻齊司農莫動
帑金費寧拙捨巧洽羣黎邊垣利刃豈可恃荒淫無道
有青史知警知戒勉在茲方能示衆撫遐邇雖無峻宇
有雲樓登臨不解九重愁連巖絕澗四時景憐我晚年

宵旰憂若使扶養留精力同心治理再精求氣和重農
紫宸志烽火不煙億萬秋

無暑清涼

并序

循芝逕北行折而少東過小山下紅蓮滿渚綠樹緣
隄面南夏屋軒敞長廊聯絡為無暑清涼山爽朝來
水風微度冷然善也

畏景先愁永晝長晚年好靜益傍徨三庚退暑清風至
九夏迎涼稱物芳意惜始終宵旰志踟躕自問濟時方

谷神不守還崇政暫養同心山水莊

延薰山館

并序

入無暑清涼轉西為延薰山館楹宇守樸不獲不雕
得山居雅致啟北戶引清風幾忘六月

夏木陰陰蓋溽暑炎風款款守峰銜山中無物能解愠
獨有清涼免脫衫

水芳巖秀

并序

水清則芳山靜則秀此地泉甘水清故擇其所宜邃

宇數十間於焉誦讀幾暇養靜可以滌煩可以悅性
作此自戒始終之意云

水性雜苦甜水芳即體厚名泉亦多覽未若此為首頤
卦明口實得正自養壽擇地立偃房根基度長久節宣
在茲求勤儉勿落後朝牕千巘裏峭壁似天剖遠託思
雲漢怡神至星斗精研書家奧臨池愈澀手清淡作飲
饌偏心惡旨酒讀老無逸篇年年祝大有

萬壑松風

并序

在無暑清涼之南據高阜臨深流長松環翠壑虛風
度如笙鏞迭奏聲不數西湖萬松嶺也

偃盖龍鱗萬壑青逶迤芳甸雜雲汀白華朱萼勉人事
愛敬南陔樂正經

松鶴清越

并序

進榛子峪香草遍地異花綴崖夾巖虬松蒼蔚鳴鶴
飛翔登蓬瀛臨崑圃神怡心曠洵仙人所都不老之
庭也

壽比青松願千齡葉不彫銅龍鶴髮健喜動四時調

雲山勝地

并序

萬壑松風之西高樓北向憑牕遠眺林巒煙水一望
無極氣象萬千洵登臨大觀也

萬頃園林達遠阡湖光山色入詩箋披雲見水平清理
未識無愆守節宣

四面雲山

并序

澄泉繞石迤西過泉源盤岡紆嶺有亭翼然出衆山

之巔諸峰羅列若揖若拱天氣晴朗數百里外巒光
雲影皆可遠矚亭中長風四達伏暑時蕭爽如秋

殊狀崔嵬裏蘭衢入好詩遠岑如競秀近嶺似爭奇雨
過風來繁山寒花落遲亭遙先得月樹密顯高枝潮平
無湧浪霧淨少多岐脈脈金明液溶溶積翠池常憂思
解愠樂志餘清悲素學臣鄰老者年自不知

北枕雙峰

并序

環山莊皆山也山形至北尤高亭之西北一峰峻出

勢陂陀而逶迤者金山也其東北一峰拔起勢雄偉而峯嶺者黑山也兩峰翼抱與茲亭相鼎峙焉

嶽崎岡岫紫宸闕乾地金峰坎黑山苦熱雲山雙嶺腹盆傾瞬息落溪灣

西嶺晨霞

并序

傑閣凌波軒牕四出朝霞初煥林影錯繡西山麗景入几案間始登閣若履平地忽緣梯而降方知上下樓也

雨歇更闌斗柄東成霞聚散四方風時光豈在凌雲句
寡過清談宜守中

鍾峰落照

并序

平岡之上敞亭東向諸峰橫列於前夕陽西映紅紫
萬狀似展黃公望浮嵐暖翠圖有山矗然倚天特作
金碧色者磬鍾峰也

縱目湖山千載留白雲枕澗報深秋巉巖自有爭佳處
未若此峰景最幽

南山積雪

并序

山莊之南複嶺環拱嶺上積雪經時不消於北亭遙
望皓潔凝映晴日朝鮮瓊瑤失素裁眉明月西崑閬
風差足比擬

圖畫難成邱壑容濃妝淡抹耐寒松水心山骨依然在
不改冰霜積雪冬

梨花伴月

并序

入梨樹峪過三岔口循澗西行可里許依巖架屋曲

廊上下層閣參差翠嶺作屏梨花萬樹微雲淡月時
清景猶絕

雲牕倚石壁月宇伴梨花四季風光麗千巖土氣嘉
情如白日託志結丹霞夜靜無人語朝來對客誇

曲水荷香

并序

碧溪清淺隨石盤折流為小池藕花無數綠葉高低
每新雨初過平隄水足落紅波面貼貼如泛杯蘭亭
觴詠無此天趣

荷氣參差遠益清
蘭亭曲水亦虛名
八珍旨酒前賢戒
空設流觴金玉羹

風泉清聽

并序

西峰之間流泉滴滴微風披拂滴石作琴筑音與鶴
鳴松韻相應泉味甘馨怡神養壽恰合章孝標松下
泉詩注瓶雲母滑漱齒茯苓香

瑤池芝殿老萊心
涌出新泉萬籟吟
芳檻倚欄蒸靈液
南山近指奏清音

濠濮閒想

并序

清流素練綠岫長林好鳥枝頭遊魚波際無非天適
會心處在南華秋水矣

茂林臨止水間想託身安飛躍禽魚靜神情欲狀難

天宇咸暢

調萬斯年曲

并序

湖中一山突兀頂有平臺架屋三楹北即上帝閣也
仰接層霄俯臨碧水如登妙高峰上北固煙雲海門
風月皆歸一覽

通閣斷霞應卜居人烟不到麗晴虛雲葉淡巧萬峰明
雁過初賓鴻侶鷗雨秋花遍洲嶼

暖溜暄波

并序

曲水之南過小阜有水自牆外流入蓋湯泉餘波也
噴薄直下層石齒齒如漱玉液飛珠濺沫猶帶雲蒸
霞蔚之勢

水源暖溜輒蠲疴涌出陰陽滌蕩多懷保分流無近遠
窮簷盡誦自然歌

泉源石壁

并序

獅逕之北岡嶺蜿蜒數里翠崖如壁下映流泉泉水
靜深尋源徙倚詠朱子問渠那得清如許為有源頭
活水來之句悠然有會

水源依石壁雜踏至河隈清鏡分霄漢層波濺碧苔日
長定九數髮白考三才天貺名猶鄙居心思道該

青楓綠嶼

并序

北嶺多楓葉茂而美蔭其色油然不減梧桐芭蕉也

疎牕掩映虛涼自生蘿蒿交枝垂掛崖畔水似青羅
帶山如碧玉簪奇境在戶牖間矣

石磴高盤處青楓引物華聞聲知樹密見景絕紛譁綠
嶼臨牕牖晴雲趁綺霞忘言清靜意頻望羣生嘉

鶯轉喬木

并序

甫田叢樾之西夏木千章濃陰數里晨曦始旭宿露
未晞黃鳥好音與薰風相和流聲逸韻山中一部笙
簧也

昨日聞鶯鳴柳樹今朝閱馬至崇杠朱英紫脫平原綠
月駟雲騎錯落驪

香遠益清

調柳稍青

并序

曲水之東開涼軒前後臨池中植重臺千葉諸名種
翠蓋凌波朱房含露流風冉冉芳氣竟谷

出水漣漪香清益遠不染偏竒沙漠龍堆青湖芳草疑
是誰知 移根各地參差歸何處那分公私樓起千層
荷占數頃炎景相宜

金蓮暎日

并序

廣庭數畝植金蓮花萬本枝葉高挺花面圓徑二寸
餘日光照射精彩煥目登樓下視直作黃金布地觀
正色山川秀金蓮出五臺塞北無梅竹炎天暎日開

遠近泉聲

并序

北為趵突泉湧地麓沸西為瀑布銀河倒瀉晶簾暎
崖微風斜捲珠璣散空前後池塘白蓮萬朶花芬泉
響直入廬山勝境矣

引泉開瀑布迸水起飛珠鏘玉雲巖應色空有若無

雲帆月舫

調太平時

并序

臨水倣舟形為閣廣一室袤數倍之周以石闌疏牕
掩映宛如駕輕雲浮明月上有樓可登眺亦如舵樓
也

閣影凌波不動濤接靈鼉蓬萊別殿掛雲霄
揮毫四季風光總無竭卧聞簫後樂先憂薰絃意蘊義文

芳渚臨流

并序

亭臨曲渚巨石枕流湖水自長橋瀉出至此折而南
行亭左右岸石天成亘二里許蒼苔紫蘚豐草灌木
極似范寬圖畫

隄柳汀沙翡翠茵清溪芳渚躍凡鱗數叢夾岸山花放
獨坐臨流惜谷神

雲容水態

并序

關口之南有室東向綠坡下望綠樹為田青峰如堵
川流溶溶白雲冶冶不知孰為水也由長橋而渡疑

入四明山中一逕分過雲南北

雨過雲容易散波流水態長存悠然世俗惟念必得經

書考原

澄泉遶石

并序

亭南臨石池西二里許為泉源源自石罅出截架鳴
簾依山引流曲折而至雨後谿壑奔注各作石堰以
遏泥沙故池水常澄澈可鑒

每存高靜意至此結衡茅樹密開行路山長疑近郊水

泉繞舊石雉，雀樂新巢晴。夜荷珠滴露，凝衆木梢。

澄波疊翠

并序

如意洲之後小亭臨湖，湖水清漣徹底，北面層巒重掩，雲簇濤湧，特開屏障，扁舟過此，輒為流連。正如韋應物詩云：「碧泉交幽，絕賞愛未能去。」

疊翠聳千仞，澄波屬紫文。鑑開倒影列，返照共氤氲。

石磯觀魚

并序

遠近泉聲而南渡石步有亭，東向倚山，臨溪溪水清。

澈修鱗銜尾荇藻交枝歷歷可數溪邊有平石可坐
以垂釣

唱晚漁歌傍石磯空中任鳥帶雲飛羨魚結網何須計
備有長竿墜釣肥

鏡水雲岑

并序

後楹依嶺三面臨湖廊廡周遮隨山高下波光嵐影
變化烟雲佳景無邊令人應接不暇

層崖千尺危嶂涵綠幾重碧潭獅逕盤旋道北松枝宛

轉山南沈吟力盡難得懸象俯察仰參至理莫求別伎
經書自有包函

雙湖夾鏡

并序

山中諸泉從板橋流出匯為一湖在石橋之右復從
石橋下注放為大湖兩湖相連阻以長堤猶西湖之
裏外湖也

連山隔水百泉齊夾鏡平流花雨堤非是天然石岸起
何能人力作雕題

長虹飲練

并序

湖光澄碧一橋卧波橋南種教漢荷花萬枝間以內
地白蓮錦錯霞變清芬襲人蘇舜欽垂虹橋詩謂如
玉宮銀界徒虛語耳

長虹清徑羅層崖岫柳溪聲月照階淑景千林晴日出
禽鳴處處入音諧

甫田叢樾

并序

流杯亭之北瓜圃之西平原如掌豐草茂木麋鹿雉

兔交物其間秋涼弓勁合烝徒行步園誠獵場選地
留憩田間樂曠觀恤閭閻叢林欣賞處遍地豫豐占

水流雲在

并序

雲無心以出岫水不舍而長流造物者之無盡藏也
杜甫詩云水流心不競雲在意俱遲斯言深有體驗
雨後雲峰澄水流遠自凝岸花催短鬢高年寸寸增

趙北口水淀作

風微見水綠日暖弄牕妍樹老依根壯心平任物遷維

舟臨草岸揮翰借壺天

此日廟旁借一屋寫字

非是禽魚樂人稠

萬戶烟

閱河長歌

并序

朕閱河出郊自南苑過蘆溝順永定河之南岸見十
五年前泥村水鄉捕魚蝦而度生者今起為高屋新
宇種穀黍而有食矣水淀改成沃野溜沙變為美田
因思古人云有治人無治法斯言信哉若治之不早
民至於今未知何似也故有感而作長歌一篇以示

善後之計云爾

春風春社豔陽天雪盡塵清徧路阡曾記當時泊舟處
今成沃土及膏田十年之前汎黃水民生困苦少人煙
歷歷實情親目覩老轉少徙益難撫挾男抱女至馬前
皆云此河不可堵桑乾馬邑雖發源山中諸流數難數
吾想畿內不能防何況遠慮治淮黃數巡高下南北岸
方知渾流為民傷春末無水沙自漲雨多散漫遍汪洋
若非動衆勞人力黎庶無田漸乏食廟謨不惜費帑金

救民每歲受饑溺開河端在辨高低堤岸遠近有準則
未終二年永定成泥沙黃溜直南傾萬姓方蘇愁心解
從此鄉村祝太平昔日宵旰嘗縈慮將來善後勿紛更

暢春園西新園觀花

春光盡季月花信露羣芳細草沿階綠奇葩撲戶香寸
陰惜鬢短尺影逐時長心向詩書興精研莫可荒

湯泉應候

一為消疾駐靈泉步輦平明觀插田喜見薺華方遍野

更看修竹遠籠煙雖無玩賞因偕樂屢慶豐登共息肩
牕外雨聲滴草舍密林鶯語亦欣然

五月上旬避暑熱河塗中喜麥秋盈野雨暘得時

賦七言一律

避暑乘輿出鳳城麥秋預卜望庚晴千村共飽連年稔
萬井同歡比屋楹谷有靈泉山脈壯道無峻嶺馬蹄輕
移風易俗先忠孝蕃息編氓在厚生

夏日山莊二首

日永炎風盛純陰在內含扶陽求物理避暑豈幽探山
靜輕敲熱泉潌照碧嵐隨時駐步輦無暑亦無貪

其二

畏景消煩慮吟詩讀古風野花羅檻外山鳥滿林中雲
氣氤氲合鶯啼颯爽同無能尋麗句賦物媿難工

金蓮盛放二首

曾觀貝葉志金蓮再見清涼徧地鮮近日山房栽植茂
參差高下共爭妍

其二

數畝金蓮萬朶黃
凌晨浥露色輝煌
薰風拂檻清波映
併作芙渠滿院香

熱河產人參雖不及遼
左枝葉皆同命翰林將廷
錫畫圖因戲作七言截句記之

舊傳補氣為神草
近日庸醫誤地精
五葉五枝成洛數
順時當用在權衡

蓮花岩松牡丹

離宮初雨後花氣滿天街石壁流泉響松坪古幹佳香
凝金掌露名重玉盤釵靜裏經聲息方知道有涯

湧翠岩觀瀑賞白蓮

畢竟天然造化功方能巧設古今同噴雲百尺穿岩石
瀑水千層點藥叢波湧白蓮承曉露溪浮綠蓋動香風
經聲似脫紅塵外泡影依稀宇宙中

梨樹峪道中步輦口占二首

入峪橋分三公路傍崖步輦景何深山中獨見松林影

時有清流助鼓琴

其二

一溪轉展見山花步步石苔楊柳斜
試看目前將熟果青榛郁李並堪誇

雲巖

三庚不用碧筍酒九井何貪消暑珠
自有雲峰來樹雨巉巖風颯列茅廬

山居即事

清商方至催蟬急林葉吟風暑漸遙三伏炎蒸纔過半
山居徧地喜禾苗

春行

千紅艷萬紫鮮頻催鬚鬢方寸懸桃火柳煙恐蕩志吟
風弄月禁狂顛案牘惟勤被景牽逢春又惡鬪芳妍禮
樂詩書海岳編進德修業須鑽研曇雲寂滅淪王道老
氏無為徒苟延致知端賴格物先次第由來性理篇性
理無私天地宣太極乾坤未畫前敬承執中授受遠勿

替心傳思永年

去歲八九月雨最多民間俗說封地雨故一冬少
雪猶可支持自交立春復不見雲所以望雨甚
殷昨晚密雲四起夜深甘霖即霑田間老幼無
不舉手加額懽聲載道朕以民食為天喜均一
體故賦七言近體以示羣臣

吟詠由來喜雨多久晴喜雨更如何天心即是民心感
海甸應同畿甸歌立政剛柔符造化體仁寬裕得人和

欽定四庫全書

卷十

兩間物理原難盡勿入浮誇曲士科

清潭

一潭清冷拂遊塵活水源頭可問津靜處定知無複浪
動時須認養潛鱗臨流能解薰風意對景先愁滂雨頻
雲影波光相映處湛然澄澈見天真

古北口提督馬進良以年老辭去朕念當日鷹揚
百戰挽強執銳自守紫塞內外恬靜皆因宿將
老成之所致今回林泉深所惜也故賦五言特

記不忘疆場舊事也

勇貫先鋒氣鷹揚後陣威秦關提寶劍沙磧歷天旗白
髮秋霜肅丹心皎日輝餞飲軍民別恩崇賜御衣

五十三年冬旱十二月初二日大雪二十一日又

雪途中偶成

玉花決漭近春和步輦平明迥陌過村老憑門吟里曲
行人載道詠寒歌無塵遠視山橫塞破凍齊驅馬渡河
盈尺玉畿皆作瑞龍沙惟慮雪霜多

塞外不宜多雪

春日郊行示地方官六首

警蹕幸畿南中和慰閭里千村靜路塵淑氣遍遠邇

其二

每春來此地黎庶盡安康尚德先寬政官僚勉直方

其三

春蒐省耕種莫悞農桑時假寐羹牆睹殷勤意在茲

其四

牧民寄所重授鉞賴宣風曩昔官箴在開誠上下同

其五

平成多歷年生齒既蕃庶惟食在天時輕徭民自豫

其六

案讀五經義遐觀四海圖緬懷洙泗訓期共樂天衢

舟中觀耕種

四野春耕阡陌安徐牽密纜望河干土肥原係黃沙過

永定河泛濫之際遍地黃水自治河之後得以耕種辛苦先年挽異瀾

南方青竹叢林不乏觀玩北地氣寒非保護得宜

即難藝植朕嘗有事河干往來數次覽竹樹之
暢茂暫時停輦即行後于禁苑種植頗蕃今經
三十餘年邇來延至數畝之廣其圍至八寸徑
二寸五分有零古人以竹比君子因而思及草
木無知積小以至于高大人有血氣加之培養
豈非國家楨幹之選歟故賦七言一律記之

培養叢篁多歷年竹牕抱節綠雲鮮猗猗玉潤歌君子
濟濟心虛憶俊賢可愛纘紛含宿雨最宜瀟灑動新煙

餘春欲伴寒松住漸晚韶光被景牽

五十四年仲夏避暑途中瑞麥盈野賦五言律以

記

忽送清塵雨題詩吮兔毫青黃接玉粒霰霖佐瓊膏入
野農歌遍緣溪牧笛高蔚林能解愠密草滿亭皋

秋幸出郊見收成志喜五言律二首

節屆商秋早農忙屢歲豐柴門歌再稔比屋樂同風人
煙多慶色霜樹雜微紅極目高低景山川一望中

其二

滌暑高風至中分白露微
草肥宜牧馬林薄好行圍
水向堦前注峰排雲外稀
斜陽臨帳殿晚色秘天機

季冬湯泉

素雪滿川山未露霜林盈野日將斜
祈年正喜逢長至澡德非同玩物華
秉燭檢書冬夕永焚香待旦畫屏遮
靈泉每助消寒效總為純陽辨正邪

湯泉道上遇雪口占

種麥田間盼尺盈
牧羊沙漠惡飄雲
王臣率土分憂樂
須識天公有不平

曉發蘆溝

有閨春深淑景遲
長橋冰泮未流澌
徘徊風景思疇昔
千里金隄保舊規

六里橋鐵柱

鎔鑪鑄冶鎮橋西
往返行人舊迹迷
世遠傳殊誰識得
天南銅柱想應齊

水村

曾記江淮泊萬艘便旋水淀暫春遊雖無浩渺長波險
亦有清漪錦浪浮日暮帆檣排遠岸風輕簑笠聚芳洲
鄉村不識居官况漫笑朝堂身世憂

舟中觀獵

習戰昆明漢武穿于今江海靖鯨煙常思遠涉堅筋骨
每令平流演獵舩雁陣驚鎗離復合鷗羣畏弩散還連
衰年雖乏挽強力黽勉春蒐以德先

閱永定河隄

有序

康熙四十年永定河告成至今十六載隄岸堅固並無
氾濫去歲山水陡長幾不能保所以春幸回鑾便
道察閱方知昔年修築有益於民生永保安瀾矣故
賦七言近體以記其事

豫定安瀾在事前每逢雨潦自心牽帑金不惜籌耕種
膏土惟思廣陌阡隄老失防愁剝蝕岸堅常護幸安全
肩輿頻視桃花水滾滾渾波通碧漣

風阻駐蹕白洋湖偶成

平波數頃似江聲
風阻湖邊一日程
可笑當年巡幸遠
依稀吳越列行營

小滿後偶旱途中祈雨四月二十三日甘霖大霽
夙夜愁懷春夏間天時難信未怡顏
平原晚麥纖莖稿
四野新禾旱色殷
乍起雲光連嶺岫
先垂雨脚遍人寰
共沾甘澍敷膏澤
民食方知稼穡艱

山莊四季

春

節屆三春勝發生萬景齊諸花候玉輦百穀待村犁

夏

九夏愁暘雨千林葉正肥祇因思避暑端拱計頻違

秋

金風多爽颯清露滴煙浮目睹倉箱滿方知歲有秋

冬

歲暮添霜鬢殷勤宵旰勞地寒盈尺雪還慮北風高

弘恩寺

解夏清襟陌上塵
盂蘭大喜見桃秦
臨風洗鉢龍池雨
凝露舒蓮瀑水濱
送節雙輪應夢相
收成萬物足深淳
窮通莫問老僧語
一任平生今古津

題新安道上

滿目平川映遠空
身形少健一衰翁
社前荷鋤爭春暖
隴畔扶犁趁晚風
雨澤深邀天地德
耕桑還賴穡人功
京南每出同村叟
總得陽和一氣中

山莊遠眺

島嶼堪圖畫溪橋宛自成
池邊樹影接峰外月華生
衆鳥巢簷穩羣獐伏地平
無知知德化推擴至民情

登四面雲山

雲梯石磴逼籠從倚杖傍
觀衆壑同更上一層圖遠
望奈何樹雜與煙籠

夏日山莊百花齊放

咫尺雄關一線牆景風已拂
尚芬芳近都愛此清涼地

逢草逢花莫不香

山居

迎薰避暑駐山莊
四顧重重邱壑長
雨後雛鶯歌密樹
風前練雀舞斜廊
靜觀得趣無非景
佳興涵虛可致涼
烹茗汲泉清意味
箇中誰解有真香

喜嶺外水土

露凝肥草淨無塵
處處泉源漾碧津
食少事多宵旰老
暫偷閒暇養吾身

臣聞書者古之號令虞夏商周之書其大者皆二帝三王實心實政之宣於口者也蓋聖人知周萬物而道濟天下所以裁成天地之道輔相天地之宜以左右民者布之為令則莫不信從書之於冊則世為天下法洪範所謂是彝是訓于帝其訓宋儒邵雍所謂口代天言者是也我

國家誕膺

天命

列聖相承所以弘濟民物者與二帝三王先後同揆而定鼎
燕京畿輔之內服教尤先近光最切我

世祖章皇帝初登

宸極

頒訓太學

御製祭明莊烈帝文及表忠錄褒明臣楊繼盛等二三大政
肇發於

京畿萬邦黎獻莫不喁喁嚮風我

聖祖仁皇帝深仁厚澤淪浹於海內者六十有一年每頒
詔令農夫野老兒童女婦莫不聚觀感歎以及春秋時
巡畿內駐蹕之地凡有題詠遠近傳誦我

皇上丕承謨烈訓迪庶官整齊百度而尤加意於

京畿之禮俗正服式勸樹藝興井田稽屯莊懲豪暴逐
蠹胥絕博戲詰逋逃

聖謨洋洋善良蒙休而憸民為之悚息以視成周之董正
三事高宗之嘉靖殷邦實有過焉臣等承

命纂修通志敬錄

三朝勅諭為畿輔政教而

特頒并

御製詩文有涉於地事民風物產者裒為十卷登諸簡端俾

官吏士民誦

皇極之敷言是訓是行億萬斯年永為法守云

畿輔通志卷十

欽定四庫全書

史部

畿輔通志卷十一

詳校官監察御史臣劉人睿

檢討臣德生覆勘

總校官進士臣繆璘

校對官庶吉士臣吳裕德

謄錄監生臣徐瑤

欽定四庫全書

畿輔通志卷十一

京師

我

國家誕膺天命撫有寰宇東臨滄海西被流沙南距交趾北極大漠海隅日出閭不率俾而光宅

京師實當恒代渤碣之中大矣哉踞九州之上游俯萬方如庭戶土風宣暢百物阜安洵北幹崇隆之氣所

鬱盤而融結也昔朱子統論海內山川形勢謂此地
山脈自雲中來岱宗聳其左華嶽峙其右襟帶黃河
而嵩高為前案又其前則淮南江南五嶺諸山環拱
而內嚮者凡三四重自古建都之地莫與比並粵稽
載籍軒轅氏都涿鹿顓頊氏都高陽近代遼金元明
相繼營建於此而我

朝發祥於長白天作高山其南麓分為二幹東包朝鮮
西折為醫巫閭以及

興京

盛京塞門諸山蜿蜒綿亘擁衛於肩背者復數重四面形勝皆我版圖是則前代所未有也體厚者勢崇源洪者流遠億萬斯年之丕基蓋於茲而永建矣

城池

京城周圍四十里為九門南曰正陽崇文宣武東曰朝陽東直西曰阜成西直北曰安定德勝城南一面長二千二百九十五丈九尺三寸北二千二百三十二

丈四尺五寸東一千七百八十六丈九尺三寸西一千五百六十四丈五尺二寸高三丈五尺五寸垛口五尺八寸基六丈二尺頂收五丈

遼史南京析津府城方三十六里崇三丈衡廣一丈五尺八門東曰安東迎春南曰開陽丹鳳西曰顯西清普北曰通天拱辰金史海陵天德二年始圖上燕城宮室制度三月命張浩等增廣燕城城門十三東曰施仁宣曜陽春西曰麗澤顯華彰義南曰景風豐

宜端禮北曰會城通元崇智光泰周七十五里元史
至元四年城京師方六十里十一門正南曰麗正南
之右曰順承南之左曰文明北之東曰安貞北之西
曰健德正東曰崇仁東之右曰齊化東之左曰光熙
正西曰和義西之右曰肅清西之左曰平則明寶錄
洪武元年徐達取元都指揮華雲龍經理築城縮其
城之北五里廢光熙清肅二門其九門俱仍舊永樂
七年營北京城十九年營建宮殿成乃拓其城周圍

四十里正統二年命太監阮安等修城樓四年工成
乃改麗正曰正陽文明曰崇文順成曰宣武齊化曰
朝陽平則曰阜成我

朝定鼎宅中建極屢加修整滿洲蒙古漢軍八旗禁旅
分駐左右翼東則鑲黃正白鑲白正藍西則正黃正
紅鑲紅鑲藍翊衛

帝居又有提督九門步軍統領左右翼步軍總尉及巡城
御史專司稽察而規制弘備矣

城壕之水源出昌平州白浮村之神仙泉通榆河會一畝馬眼諸泉匯為七里灤東流遶都城曰玉河又西山玉泉從水關徑銀錠橋流入

西苑遶

宮禁自玉河橋入城壕合流至大通橋入漕河明正統時侍講劉球請於城外宣武橋西量作減水河以洩城中諸水從之仍命欽天監正皇甫仲和等審視仲和言宣武門西舊有凉水河其東城河南岸亦有舊

溝皆可疏通以洩水勢嘉靖中工部尚書雷禮以外城壕池淺狹請悉深濬水乃自城西北隅環城東注歷九橋九閘從城東南隅流入大通橋

皇城起

大清門歷長安左右門東安西安地安三門周圍三千二百二十五丈九尺四寸正南曰

大清門少北曰長安左門曰長安右門東曰東安門西曰西安門正北曰地安門自

大清門之內曰天安門天安門之內曰端門左曰闕左門右曰闕右門

按地安門舊為北安門

本朝順治九年改今名天安門舊為承天門順治八年改今名

紫禁城起

午門歷東華西華神武三門南北各二百三十六丈二尺東西各三百二丈九尺五寸城高三丈塼口四尺

五寸五分基厚二丈五尺頂收二丈一尺二寸五分
南曰

午門左曰左掖門右曰右掖門太和殿前曰太和門左
曰昭德門右曰貞度門其東之南曰協和門北曰左
翼門其西之南曰雍和門北曰右翼門太和殿前東
為體仁閣西為弘義閣由太和殿入為中和殿保和
殿東有中左門後左門西有中右門後右門保和殿
之後為乾清門左曰內左門右曰內右門其東為景

運門西為隆宗門自協和門出為東華門自雍和門出為西華門城之正北曰神武門文華殿在東華門內箭亭之南武英殿在西華門內南薰殿在武英殿之南

按遼史皇城在南京析津府西南隅大內門曰宣教外三門曰南端左掖右掖西曰顯西設而不開北曰子北統和二十四年改南京宣教門為元和外三門為南端左掖門為萬春右掖門為千秋大

金國志宮城四圍凡九里三十步自天津橋之北
曰宣陽門內城之南門也東曰宣華西曰玉華北
曰拱宸輟耕錄元宮城周圍九里三十步分六門
正南曰崇天崇天之左曰星拱右曰雲從東曰東
華西曰西華北曰厚載舊志明初燕王府建於元
之皇城舊址即今之西苑門四東曰體仁西曰尊
義南曰端禮北曰廣智至永樂十五年乃改建皇
城於東去舊宮一里許至東華門之外宣德七年

始加恢廓移東華門於河之東遷居民於灰厰西之隙地

京城南一面轉抱東西角樓止長二十八里為七門南曰永定左安右安東曰廣渠東便西曰廣寧西便城南一面長二千四百五十四丈四尺七寸東一千八十五丈一尺西一千九十三丈二尺各高二丈塼口四尺基厚二丈頂收一丈四尺各門俱有甕城

外城建於嘉靖三十二年先是成化十二年定西侯

蔣琬言宜倣南京舊制築土城嘉靖二十一年都御史毛伯溫等言成祖遷都金臺當時內城足居所以外城未立今城外之民殆倍城中宜築外城城外取土即可成壕時以給事中劉養直言而止二十九年議築正陽崇文宣武三關廂外城不果三十二年朱伯辰復言四郊咸有土城故址環繞如規周可百二十餘里因命都督陸炳平江伯陳圭等相度形勢尋又以西南地勢窪下難於施工命先築南面四十一

年工部尚書雷禮請修繕重城添永定等七門之獲
城從之四十三年京師重城成我

朝雍正五年

特發帑金於廣寧門外疊石為道廣二丈長亘九里九年
增修城洞門復廣石道數里又於朝陽門外疊石為
道直至通州所費以億萬計行旅商賈引重致遠感
頌

皇仁因立

龍亭於道左

壇廟

圓丘壇在正陽門外南郊其制三成南向一成面徑五丈九尺高九尺二成面徑九丈高八尺一寸三成面徑十二丈高八尺一寸各成面輒用一九七五陽數及周圍欄板柱子皆青色琉璃四出陛各九級白石為之內壝圓牆九十七丈七尺五寸高八尺一寸厚二尺七寸五分靈星石門四面各三外壝方牆二百四丈

八尺五寸高九尺一寸厚二尺七寸靈星門如前壇之東有神庫神厨祭器庫宰牲亭壇之西有神樂觀犧牲所鑾駕庫又外圍方牆為門四南曰昭亨東曰泰元西曰廣利北曰成貞雍正八年

特發帑金於壇門外疊石為道至正陽橋

皇穹宇在

圓丘後制圓象天環轉八柱圓頂重簷覆以青瓦中安寶頂東西南三出陛各十四級檻牆欄柱俱用青色琉璃

左右兩廡各五間亦覆青瓦四圍圓牆前設門三每
年冬至大祀

天於圜丘日月星辰雲雨風雷分四從壇

祈穀壇在

圜丘壇北曰大享殿殿以圓為制周圍共十二柱內柱亦十
有二中龍井柱四圓頂三層上覆青瓦中覆黃瓦下
覆綠瓦中安寶頂殿陛圍圓三級白石為之殿臺三
層俱有石欄前後各三出陛上中各九級下十級東

西一出陛級同左右兩廡各二座前廡九間後廡七間俱覆綠瓦四圍方牆前為大享門東西北各有門又外圍牆為門四南即成貞門東西北亦各有門後為

皇乾殿五間上覆青瓦下繞石欄牆之東有神庫神厨宰牲

亭西南有齋宮每年正月上辛恭祀有事則改次辛按明初以冬至祀天圜丘夏至祀地方澤洪武十年罷之而以正月上辛合祀天地于大祀殿并日

月星辰山川諸神俱在焉嘉靖九年分為圜丘方
澤朝日夕月四郊其大祀殿則以孟春上辛祈穀
十年又改啓蟄月祈穀二十四年又改大祀殿為
大享殿而祈穀禮不行崇禎十四年復行祈穀禮
用上辛

本朝因之我

聖祖仁皇帝及我

皇上敬

天勤民躬親祀禱精禋感格宜大有之頻書也

方澤壇在安定門外其制二成北向一成面方六丈高六尺
二成面方十丈六寸高六尺各成面輒用六八陰數
皆黃色琉璃青白石包砌四出陞各八級周圍水渠
一道長四十九丈四尺四寸深八尺六寸濶六尺內
壝方牆二十七丈二尺高六尺厚二尺靈星門六正
北三東西南各一外壝方牆四十二丈高八尺厚二
尺四寸靈星門如前壇之西南有神庫神厨樂器庫

宰牲亭西北為齋宮又有鑾駕庫又外圍方牆二重
內重北門三東西南門各一最外惟西向三門又西
有石坊曰泰折街雍正二年

欽定曰廣厚街

皇祇室在

方澤後向北五間上覆綠瓦四圍方牆前有門每年夏至大
祭

地於方澤五嶽五鎮四海四瀆分四從壇

本朝順治十六年

啓運山

積慶山

天柱山

隆業山附四從壇分配十八年罷

積慶山配享康熙二年以

昌瑞山從五鎮之次

按歷代天地之祭分合不一由漢厯唐千餘年皆

合祭其分祭者惟魏文帝之太和周武帝之建德
隋高祖之開皇唐明皇之開元四祭而已宋之分
祭惟元豐六年一祭而已明初亦合祭天地於南
郊歲以孟春行事至嘉靖九年乃作圜丘方澤於
南北郊分祭天地

本朝虔供祀典定以冬至祀

天於圜丘夏至祭

地於方澤就陽谷陰比之前代義益周而制更備矣

朝日壇在朝陽門外西向方廣五丈高五尺九寸壇面
甃青色琉璃四出陛九級圓壇牆七十五丈高八尺
一寸厚二尺三寸靈星門六正西三東南北各一壇
之北有神庫神厨宰牲亭祭器庫其南為齋宮外圍
牆前方後圓西北各三門牆之西北有石坊曰禮神
街雍正二年

欽定曰景升街每年春分祭遇甲丙戊庚壬年

親祭餘年

遣大臣攝祭

夕月壇在阜成門外東向方廣四丈高四尺六寸壇面
甃白色琉璃四出陛六級方壇牆二十四丈高八尺
厚二尺二寸八分靈星門六正東三南北西各一壇
之南有神庫神厨宰牲亭祭器庫其北為齋宮外圍
方牆東北各三門牆之東北有石坊曰禮神街雍正
二年

欽定曰光恒街每年秋分祭遇丑未辰戌年

親祭餘年

遣大臣攝祭

太歲壇在正陽門外之西正殿

太歲兩廡月將殿七間南向東西兩廡各十一間前有
拜殿七間壇之東為齋宮其西有神庫神厨祭器庫
宰牲亭每年於正月上旬吉日十二月杪俱以時享

太廟日致祭

按明洪武三年建山川壇於天地壇之西繚牆周

迴六里中為正殿七壇以祀太歲風雲雷雨五嶽
四鎮四海四瀆鍾山之神東西兩廡六壇以祀山
川城隍月將之神永樂時於北京建壇一如其制
嘉靖十一年即山川壇為天神地祇二壇始別建
壇以專祀太歲隆慶元年禮官議神祇既從祀南
北郊不宜復有神祇壇之祭而太歲之祭如故

本朝亦專祀太歲其山川神祇二壇並省

先農壇在太歲壇西南南向方廣四丈七尺高四尺五

寸四出陞東為齋宮鑾駕庫東北為神倉東南為
具服殿殿前為觀耕臺方廣五丈高五尺南東西三
出陞藉田在觀耕臺南每歲仲春

皇上舉行耕藉大典

親詣行禮

按歷代耕藉之制載在經史漢耕於鉅定於美田
於定陶於下邳無定所唐戒近郊履千畝行九推
宋耕數十畝或十有二畦無定數明制稍備我

世祖章皇帝順治十一年

親享先農行耕藉禮

聖祖仁皇帝康熙十一年

親享先農行耕藉禮

皇上恪共祀事珍重農功於雍正二年

親載耒耜舉行大典以後每歲

躬耕並

勅各省守土之官俱行耕藉之禮愷澤弘敷

天和遠召頻生嘉穀屢慶豐年禾黍呈祥或一莖十有餘穗或一稊二米洵亘古未有之盛事也

社稷壇在

午門右北向同壇同壝壇二成上成方五丈次成方五丈三尺高五尺四出陛用五色土隨方築之壝垣四面開靈星門垣之色亦各如其方壇之北有殿又有拜殿俱南向其西為神庫神厨宰牲亭外為周垣東西廣六十六丈七尺五寸南北袤八十六丈六尺五

寸垣皆飾以紅覆以黃琉璃瓦

太廟在

皇城內午門之左南向前殿九間東西兩廡各十五間
中殿九間東西兩廡各五間後殿九間東西兩廡各
五間南為廟門東為神庫宰牲亭西為神厨每年四
孟月時享歲暮禘祭以親王及功臣配享兩廡我

聖祖仁皇帝

躬承大祭齋明儼恪始終不懈

皇上敬

天法

祖仁孝誠敬每當大祀尤為精意感孚所以

上帝居歆

祖考來享為自古所罕覲云

奉先殿在

景運門之東南向前殿七間後殿七間中設暖閣寶床

內安

神龕順治十三年

世祖章皇帝以

太廟時享逾時稍遠思得朝夕奠獻以展孝思命稽往制建

立

奉先殿十四年告成康熙二十年

聖祖復命重修節序朔望香帛酒醴內務府掌儀司供獻

每逢

萬壽聖誕及

國家大典禮若

乘輿出入則告祭

壽皇殿在景山北上門內安奉

聖祖仁皇帝御容

皇上孝思純篤歲時朔望必

親詣行禮

傳心殿在文華殿東南向康熙二十四年崇祀

皇師伏羲氏神農氏軒轅氏

帝師陶唐氏有虞氏

王師夏禹王商湯王周文王武王聖位正設南向

先聖周公聖位左旁西向

先師孔子聖位右旁東向每年仲春仲秋

經筵前一日遣官告祭

山陵

孝莊文皇后昭西陵在

世祖章皇帝孝陵之南

按先是

聖祖仁皇帝遵奉

孝莊文皇后遺命以

昭陵奉安年久未便合葬建造兆域必近

孝陵乃於康熙二十七年擇地

孝陵之南建

暫安奉殿

皇上雍正二年以

暫安奉殿安奉三十餘年

聖祖歷數綿長子孫蕃衍海宇昇平民物康阜乃恪遵
文皇后慈旨仰體

聖祖孝思即

暫安奉殿建為

昭西陵以定萬年之兆云

世祖章皇帝孝陵在遵化州西七十里鳳臺山麓

孝康章皇后

端敬皇后合葬

按鳳臺山峰巒層秀頂如華蓋羣岫環拱衆水來
歸規模弘整天造地設五峰山在東北崛起東曰
快目南曰瑞雲西曰紅翠北曰虎岫中曰紫蓋綿
聯起伏互相擁護

寶城前為享殿曰隆恩殿門曰隆恩門

神道南為

神功聖德碑亭外為紅門康熙二年封鳳臺山為昌瑞山從

祀地壇禮部工部題定地界自分水嶺起左山麓以南至鮎魚池口瞭馬臺以北河西岸山麓以西右山麓以南至寬佃峪口以北河東岸山麓以東俱屬

陵寢重地守衛森嚴又

陵後馬蘭關第二臺以西龍洞關第二臺以東不應有城皆撤焉

孝惠章皇后孝東陵在

孝陵東

聖祖仁皇帝景陵在昌瑞山之東

孝誠仁皇后

孝昭仁皇后

孝懿仁皇后

孝恭仁皇后合葬

敬敏皇貴妃祔葬

景陵匾額皆

皇上御筆親書

御製

聖德神功碑敘述

聖祖六十一年鴻猷盛烈昭示萬世凡數千言

特命並立二碑一刻清文一刻漢文至碑亭制度悉準

孝陵

按

昌瑞山脈自太行逶迤而來前有金星峰後有分水嶺

諸山即太行之支麓左有鮎魚關馬蘭峪右有寬
佃峪黃花山森羅迴拱鳳臺左水鳳臺右水分流
夾繞俱匯於龍虎峪誠乃天生福地靈區陵垣東
自馬蘭關城起南過馬蘭峪城西東南由石門驛
北南過金星山西南由天臺山北北由杏花山西
抵黃花山東南山角廣袤四十餘里左為水關者
十二右為水關者十南面正門三墻門二

孝陵於康熙十六年彩雲煥發從巳越午雍正元年著草叢

生莖長八尺雍正五年嘉禾呈秀

景陵安奉

龍輜之日五色祥雲覆護繚繞經時雍正六年芝生

寶鼎七年復生於

聖德神功碑側鳳凰鳴於天臺山十二年復生九芝於

寶城最近山上

世祖

聖祖峻德洪功

皇上至誠純孝感名盖如此云

妃園寢在

景陵之東

溫僖貴妃

慧妃

榮妃

平妃

良妃

欽定四庫全書



畿輔通志

康熙二十年建妃衙門雍正五年尊為妃園寢

祠宇

堂子在長安左門外玉河橋東享殿三間環以周廊中為八角亭北為神房外為殿門又外為大門神厨順治元年建每年元旦

親祭

歷代帝王廟在阜城門內街北正殿九間曰景德崇聖之殿重簷五出陞東西兩廡各七間南為景德門東為

神庫神厨西為宰牲亭又南為廟門街曰景德街每
年春秋二仲月祭以歷代名臣配享兩廡

按歷代帝王廟崇祀三皇五帝三王及漢唐宋遼
金元明創業諸帝兩廡以開國勲臣配享

本朝康熙六十一年

聖祖仁皇帝特命重加詳定歷代享國之君俱增入崇祀其
名臣輔佐太平者增入配享雍正元年

皇上祇遵

聖諭虔設神位上自伏羲下迄有明凡一百六十四帝名臣
自風后力牧以下七十九人

皇上常親詣行禮以展誠敬

文廟在安定門內國子監之東南向正殿七間三出陛
題曰

先師廟中顏

聖祖仁皇帝御書萬世師表

皇上御書生民未有匾額東掖為祭器庫西掖為樂器庫

東西兩廡各十九間丹墀中建碑亭五兩廡之南折而北向為東西序各十一間門各一兩序之中為廟門五間中門三門左右列石鼓各五相傳為周宣王獵碣元大德十一年虞集為大都路教授移置國學今置廟門之內其文漫滅不可讀潘迪音韻載四百九十四字薛尚功帖載四百五十一字今存三百二十五字殿後為

崇聖祠初名啓聖祠雍正元年加封

先師五代王爵改題今名每年春秋二仲上丁日致祭有事則改次丁或下丁四配十一哲配享兩廡先賢先儒分祀

本朝順治九年

世祖章皇帝親詣

文廟行釋奠禮十七年以修葺

文廟成

親詣釋奠康熙八年

聖祖仁皇帝親詣

文廟行釋奠禮

皇上雍正二年釋奠

文廟以舊稱臨雍幸學皆尊君之辭

特命改稱詣學以表至敬兩廡從祀先儒

特命重加詳議增定復頒

諭旨每年親祭一次雍正六年二月仲丁

親詣行禮

御製詩刻石建碑

顯佑宮在地安門西北每年恭遇

萬壽日遣官致祭

東嶽廟在朝陽門外二里每年恭遇

萬壽日遣官致祭

元延祐中建廟有趙孟頫書張天師神道碑虞集隸
書仁聖宮碑趙世延書昭德殿碑並列階下明正統
中重修有英宗御製碑記

本朝康熙三十九年重建

聖祖仁皇帝御製碑文記焉

都城隍廟在京城西隅每年秋遣官致祭恭遇

萬壽日遣官致祭雍正三年重修

紫禁城城隍廟在

神武門內之西每年秋遣官致祭恭遇

萬壽日遣官致祭

闕帝廟在地安門西每年春秋二仲月及五月十三日遣官致祭

本朝順治九年

勅封神為忠義神武關聖大帝雍正三年

封神曾祖為光昭公祖裕昌公父成忠公崇祀後殿五年

修廟

御書忠貫天人匾額懸置廟中一在正陽門月城內

火神廟在地安門北每年六月二十三日遣官致祭

按唐貞觀中建廟元至正中即其遺址重建明萬

歷中增飾壯麗

本朝康熙二年列於祀典

宣仁廟在

紫禁城外東北隅

本朝雍正六年

勅建以祀

風神

御賜題額

時應宮在西安門內金鰲坊南

本朝雍正二年

勅建以祀

龍神

御賜題額

凝和廟在

皇城東

本朝雍正八年

勅建以祀

雲神

御賜題額

昭顯廟在興龍寺南

本朝雍正八年

勅建以祀

雷神

御賜題額

景惠殿在太醫院北每年仲春仲冬上甲日遣禮部堂

金匱要略卷十一
官致祭太醫院官分獻

按明嘉靖中建廟崇祀三皇以勾芒祝融風后力
牧配享東西兩廡岐伯雷公華佗等二十八人從
祀

崇元觀在

皇城內西北隅明時建

光明殿在

皇城內西南隅明嘉靖年建

拜斗殿在

皇城內西南隅明嘉靖年建

福祐寺在

皇城內西華門之北

本朝雍正元年建

白塔山寺在承光殿北

按

本朝順治八年即瓊花島舊址立塔建寺康熙十八年

重修

弘仁寺在太液池西南岸

本朝康熙五年建有

聖祖御製碑記

靜默寺在雷神廟南康熙五十一年

勅建

松竹寺在

皇城內東北隅康熙年

勅建

廣濟寺在西四牌樓康熙年

勅建

柏林寺在雍和宮南元時建康熙年

勅建

大興隆寺在西長安街元至元中建有二塔一七級一
九級寺僧海雲可菴葬其下正統十三年修嘉靖十
五年改為講武堂

崇國寺在府西北隅元時有東西二崇國寺此西寺也
有趙孟頫所書寺碑明宣德間重建賜額大隆善護
國寺寺為托克托丞相故宅今佛坐下有遺像

本朝康熙六十一年奉

勅重建

白塔寺遼壽昌二年建塔制如幢色白如銀元至元八
年加銅網石欄十六年改建聖壽萬安寺明天順二
年改名妙應寺

福壽寺在海子內

拈花寺在

皇城西北舊名護國報恩千佛寺明萬歷初建

本朝雍正十一年奉

勅重修

賜額拈花寺

御製碑文

勅果親王書丹勒石以紀

萬壽寺在

皇城西

本朝雍正十一年建

覺生寺在

皇城内西北

本朝雍正十一年

勅建

廣通寺在

皇城西

本朝雍正十一年建

觀音寺在

皇城西南

本朝雍正十一年建

大高元殿在

神武門之北南向

勅建怡賢親王祠在宛平縣治東一在

正陽門內東南隅雍正十年戶部公建

苑囿

瀛臺在

皇城內西華門之西

按太液池之南舊為南臺池水澄泓波光潋灩
蒲散綠茵茵舒紅兩岸芳樹陰森畫橋蜿蜒崇臺
傑閣掩映交輝欄檻之外遠岫遙峰倒影波中望
如蓬島

聖祖仁皇帝御以避暑肇錫今名又於苑中

特建勤政樓夏月

御殿聽政或時

召大臣遊宴其中臺之正北為五龍亭中曰龍澤左曰澄祥
曰滋香右曰湧瑞曰浮翠合名之為五龍亭

孝莊文皇后嘗避暑於此

聖祖每駕御舟問安或侍膳亭上左右為蕉園臨漪亭水雲
榭承光殿紫光閣臺之西南為豐澤園秋雲亭知

稼軒嘗

御以觀稼池中石梁長數百步東西各建華表曰金鰲曰玉
竦迤北稍東又有石橋亦峙華表北曰堆雲南曰
積翠明為西苑禁地

本朝自紫禁城外車馬皆得往來過之者如歷仙源云
南海子在外城永定門外

按海子之水自萬泉莊平地湧出共匯於此為海
子大小凡三方一百六十里繚以圍牆四面各為

門物產充牣為遊獵之地元曰飛放泊明永樂中
擴其地

本朝因之時

命禁旅行園以肄武事

暢春園在

京城西直門外十二里

按園地本名海淀明武清侯李偉別墅在此

聖祖仁皇帝以駐蹕之暇飲泉而甘乃

命因其勝概稍加恢擴築宮設籞不事華飾

賜名暢春園時奉

孝莊文皇后

孝惠章皇后晏憩於此

御製記文以紀其勝

圓明園在

暢春園北

皇上雍邸時

聖祖賜園也疏泉扶石藻繪不施曲磴平橋高槐翠柳大門
外對列各部院朝房羣臣奏事盛夏無暑

學校

國子監在安定門內

文廟之西南

按監之中為彝倫堂

聖祖御書賜額又有

世祖

聖祖臨雍諸勅諭

聖祖御書大學聖經石刻

皇上御書文行忠信匾額堂左為繩愆廳右為博士廳兩廡有率性脩道誠心正義崇志廣業六堂為諸生肄業之所後有東西兩廂為祭酒司業休憩之地門曰集賢門街曰成賢街

本朝順治九年

世祖章皇帝臨雍行釋奠禮幸彝倫堂講書賜賚有加四

氏子孫隨班觀禮者俱送監讀書廣監生鄉試額
十五名康熙八年

聖祖仁皇帝臨雍亦準順治九年例四氏子孫觀禮者准十
五名送監讀書廣鄉試額八名雍正二年

皇上親詣太學

御藝倫堂

命祭酒司業進講諸生雲集觀光盛典

特頒諭旨廣監生鄉試額十八名郡縣學量增入學名數

文教覃敷中外嚮化琉球自康熙二十七年遣子弟入監就學至是復來為從來所罕觀云

宗學有左右二翼左翼在東大市街之東屋一百餘間右翼在瞻雲坊之北屋九十餘間為宗室弟子誦讀之所雍正三年

特建

八旗官學在各旗分地雍正五年以就學者衆乃即各旗官房容百人誦讀者增建官學

八旗義學各旗就所分地官房延師課授幼學雍正三年

特建雍正九年以選拔貢生實雍者衆

特旨修葺監門外官房二百餘間為諸生肄業地

官署

內閣在午門內東南隅文華殿之南外門西向南為本房專譯章奏迤北為大學士內閣學士治事之所東為典籍庫藏秘書圖籍又

皇史宬在東安門外東南

實錄

玉牒

起居注藏焉皆內閣經管

按明制儒臣入閣辦事預機務曰文淵閣又曰東閣

本朝初改為秘書國史弘文三院大學士集昭德門內
東南隅辦事惟新拜時於內閣一設公案康熙二

十八年始辦事閣中

起居注館在午門內之西日講官恭繕

記注之所

內務府在武英殿後

本朝特設以總管內大臣掌之領司七曰廣儲會計掌
儀都虞慎刑營造慶豐院三曰奉宸武備上駟及織
染局藥房皆各有分署

御書賜額曰職司綜理

六科在 午門外東西向吏戶禮在東兵刑工在西

按

本朝初六科直房在 午門內西與內閣相對謂之六
科廊後遷今處

中書科在 午門外之西

宗人府在

皇城東吏部公署之北西向

御書賜額曰敦崇孝弟

吏部在宗人府公署之南西向

御書賜額曰公正持衡堂後為休憩之所有明侍郎吳寬手植紫藤花左右為文選驗封稽勲考功四清吏司及司務廳分署

戶部在吏部公署之南西向

御書賜額曰九式經邦堂左右為江南浙江江西福建湖廣山東山西河南陝西四川廣東廣西雲南貴州十四清吏司及司務廳分署

總督倉場署在崇文門外朝陽坊

崇文門監督署在崇文門外街東

禮部在戶部公署之南西向

御書賜額曰寅清贊化堂左右為儀制祠祭主客精膳四
清吏司及司務廳分署行人司會同館鑄印局屬焉
按行人司署舊在長安右門外後改為督捕廳又
改為製造庫今司署在正陽門外雍正七年統於
禮部

兵部在宗人府公署之後西向

御書賜額曰整肅中樞堂左右為武選職方車駕武庫四清吏司及司務廳分署

按兵部舊有督捕司

本朝特設以侍郎主之佐以理事官及郎中員外主事公署在長安右門外康熙三十八年裁併刑部

刑部在

皇城西貫城坊東向

御書賜額曰明刑弼教堂左右為左現審右現審江南浙
江江西福建湖廣山東山西河南陝西四川廣東廣
西雲南貴州十六清吏司及司務廳督捕司分署司
獄附焉

按現審左右二司雍正二年設立係本部司官兼
攝七年更設郎中員外郎主事及筆帖式等官專
司其事

工部在戶部公署之後西向

御書賜額曰敬勅百工堂左右為營膳廩衡屯田都水四清吏司及司務廳分署瑠璃廠黑窯廠灰廠柴木廠屬焉

八旗都統公署在各旗分地

本朝定鼎之初滿洲蒙古漢軍八旗禁旅分駐左右翼正東則正白鑲白東北鑲黃東南正藍正西則正紅鑲紅西北正黃西南鑲藍各設都統副都統叅領佐領等官領之其治事未設專署雍正二年

命以各旗分地官房為都統衙門

理藩院在長安左門外長安街北玉河橋東南向

本朝特設掌蒙古喇嘛外藩之事

御書賜額曰宣化遐方堂左右為祿勛賓客柔遠理刑四

司分署

按院舊在刑部北後遷今處

都察院在刑部公署之北東向

聖祖御書賜額曰都俞吁咈堂左右為河南江南浙江山西

山東陝西掌道監察御史分署京畿道分署在其南
巡視五城御史公署皆在正陽門內之西又五城兵
馬司舊惟東城指揮有署在崇文門外朝陽坊雍正
八年

命各就所轄地以官房為署又雍正八年五城關內設巡
檢十四員關外設巡檢十二員關內各按鋪司立柵
欄四百四十處每處派撥兵丁二名人役一名令巡
檢分隸巡查關外令巡檢亦各按界址巡邏俱無定

署

翰林院在長安左門外玉河西岸北向

聖祖御書賜額曰道德仁藝堂左為講讀廳右為編檢廳後有敬一亭瀛洲亭寶善亭原心亭成樂軒皆晏休之所

按明永樂初翰林在禁內供奉不別立公署正統七年始於玉河西岸以元之故鴻臚寺為翰林院院內有劉井學士劉定之所浚在堂之左有柯亭

學士柯潛所建在堂之右

詹事府在玉河東岸西向

聖祖御書賜額曰德業仁義堂左為春坊右為司經局列署

府中皆不隸府而以翰林官序補

通政使司在長安右門外長安街南北向

御書賜額曰慎司喉舌登聞鼓院屬焉

按登聞鼓院在長安右門外舊設滿漢科道各一

員掌之雍正二年統於通政司

大理寺在都察院公署之南東向

御書賜額曰執法持平

太常寺在刑部公署之北鑾儀衛南東向

御書賜額曰祇肅明禋

光祿寺在

皇城東華門內大官珍羞良醢掌醢四司屬焉

御書賜額曰敬慎有節

太僕寺在正陽門內東中心臺

御書賜額曰勤字天育

按寺舊在長安左門外雍正七年遷今處

四譯館在正陽門外中西坊北向凡八館曰西天曰
暹羅曰回回曰八百曰高昌曰西蕃曰緬甸曰百譯
譯字生學習其中以太常寺少卿提督之隸於翰林
院

鴻臚寺在工部公署之南西向

御書賜額曰肅贊朝儀雍正五年統於禮部

欽天監在鴻臚寺公署之南西向

御書賜額曰奉時敬授

按監所司觀象臺在城東南隅一名瞻象臺上有
渾天儀如尚書璇璣玉衡圖皆鑄銅為器四柱以
銅龍架而懸之又有簡儀狀相似而省十之七止
周圍數道而已玉衡亦以銅為之如尺而首尾皆
曲有二孔對孔直窺以候中星又有銅毬左右旋
轉以象天體以方函盛之函四周作二十八宿真

形臺下小室有量天尺鑄銅人捧尺北面室正中
穴其上以候日中測景之長短中為紫微殿旁有
銅壺滴漏按元至正十六年建司天臺於大都儀
象之器悉仍金之舊而規環不協太史令郭守敬
出所製簡儀仰儀及諸儀表皆極精妙明洪武中
取至南京正統中復置觀象臺儀器銅毬方函南
面有明英宗銘

本朝康熙十一年

聖祖仁皇帝御製儀器安設臺端曰天體儀曰赤道儀曰黃道儀曰地平經儀曰地平緯儀曰紀限儀凡六座其舊儀移置臺下藏焉

太醫院在欽天監公署之南西向

按院內有明堂針灸銅人金時安撫王楫使宋時所進歲久缺壞元至元二年尼波羅國人阿尼哥修之闕鬲脈絡皆備又有針灸經石刻宋仁宗御書題篆至元間自汴移此

鑾儀衛在刑部公署之北東向左右中前後五所鑾
輿馴馬擎蓋弓矢旌節幡幢扇手斧鉞戈戟班劍
東西十二司屬焉馴象所在宣武門內之西衛中員掌
之

御書賜額曰恪恭輿衛

貢院在城東南隅觀象臺北

按院制外為崇墉四周皆施以棘院之前中左右
各樹坊中曰天下文明左曰虞門右曰周俊坊之

內為貢院門次為龍門直甬道為明遠樓左右號
舍鱗次櫛比中為至公堂東為監試廳左右為受
卷彌封謄錄對讀供給五所堂後隔以重門曰內
龍門內為聚奎堂考官閱卷之所又後為會經堂
堂東西經房相屬同考官居之按此地為元禮部
舊基明永樂時改為貢院萬厯初因故址拓地重
建

本朝三年大比屢加增葺規制益為弘備云

衍聖公府在

皇城東太僕寺街明仁宗賜第

教場在德勝門外

大閱時臨幸

本朝順治十三年建

八旗教場在

京城各門外鑲黃旗在安定門外正黃旗在德勝門外
正白旗在東直門外鑲白旗在朝陽門外正紅旗鑲

紅旗在阜成門外正藍旗在崇文門外鑲藍旗在宣武門外各有演武廳以時講肄操練

歷局在宣武門內天主堂東

按明天啓二年建首善書院後禮部尚書徐光啓於此修歷改署曰歷局

本朝因之

寶泉局在順天府治東南屬戶部雍正二年添設東西南北四局以裕鼓鑄仍統於寶泉

寶源局在朝陽門內西南屬工部

織染局在地安門內之東

倉庫

火倉在戶部公署之西

木倉在長安右門外屬工部

海運倉廩八十座

舊太倉廩八十座

南新倉廩七十五座

祿米倉廩五十七座

北新倉廩八十座

興平倉廩八十座

富新倉廩六十四座

太平倉廩八十座以上八倉俱在

京城之東

萬安倉廩四十二座雍正元年建

裕豐倉廩六十四座雍正七年建

儲濟倉廩一百八座雍正七年建以上三倉俱在

正陽門外

豐益倉廩三十座雍正八年建在

圓明園西

本裕倉在清河廩三十座

大運西倉廩二百三座

大運中倉廩一百一十九座

大運南倉廩八十一座以上三倉俱在通州

鑾駕庫在長安左門外翰林院公署之西

戶部大庫在戶部公署東北

緞疋庫屬戶部舊在戶部公署今在西安門內

顏料庫屬戶部舊在戶部公署今在西安門內

節慎庫在工部公署之東

製造庫在長安右門外以上二庫俱屬工部又門神

庫簾子庫俱屬製造庫

按門神庫在東安門內小南城簾子庫在地安門

內之東雍正二年併入製造庫經管

西十庫在西安門內曰甲字庫乙字庫屬戶部丙字庫丁字庫戊字庫屬工部承運庫廣盈庫廣惠庫廣積庫贓罰庫屬內務府又內務府所屬緞庫盛甲庫鞍庫氊庫俱在

太和殿東銀庫衣服庫茶葉庫在

太和殿西瓷器庫器皿庫在西華門內木庫房庫鐵庫在營造司署傍

畿輔通志卷十一